

摛藻堂四庫全書薈要

集部

欽定四庫全書會要

集部

丹淵集卷五至八

詳校官助教臣常循



欽定四庫全書
會要卷一萬四千七百九十三

集部

丹淵集卷五

宋文同撰

詩五十一首

賈佩蘭歌

綠髮憶新梳君王侍玉壺相隨五色鳳飛止帝宮梧鳳時入紫烟一舉萬羽趨乘風恣教盪衆首傾雲衢帝既天上行留鳳不與俱鏹翻下永巷髡鬚編鉗徒赭衣春

且歌北望獄鳥鶩呼凜凜赤喙鳩一盃死其雛鳳亦飲瘡
藥鞠域支體殊娥姁豈不仁幸此全賤軀歸來南山下
秋風裂羅襦寒牀覆龍具霜雪侵肌膚忽自感時節臨
風只長吁徒懷掖庭事飲泣對民夫

徐太元

彼徐太元者杭州之參軍同僚曰張惠犯贓抵深文徐
哀其母老詣獄輒自陳謂惠所受贓太元本同分今儻
獨坐惠此獄無乃寃均之不滿法惠遂減死論太元亦

坐免不調十餘年西臺李侍郎曲選世所賢聞徐之所
為特以不次遷擢授鄭司功太元名始傳後為申王師
德行人推先嗟哉後世人恩義日不完初既同職事言
色殊相歡謔酒與僕食旦夕同杯盤一有不得意艱險
立萬端推之入網羅又以毒箭攢昂然了自得銜露其
術全此等雖曰人犬彘曾豈然眼見與耳聞天下何可
言我今作此詩中有二義存欲使在位者此風幸相敦
勿令有識人命爾為蝎蛇又欲彼正士為國掌三銓須

察此惡子廢斥入冗員自然此浮薄不長其姦根覽者請味之勿罪其言煩

蓋寬饒

次公清而狂其本出天性惜哉公廉質不以儒術正陷害公峭刻奸犯語堅勁在位及貴戚合然仇怨盛稀遷愈失意躁戾因以逞王生識其趣勸以全壽命胡為不開納封事轉凌橫五帝宮天下此語豈君聽上怒以不改章下求衆定確然金吾奏直以大逆訂雖為鄭昌頌

萬嫉掩一諍遂爾屬諸吏羞復受笞榜行當北闕下輒
引佩刀剄時雖衆所憐終為瑞士病

諸葛豐

少年名特立初為貢公起元帝擢司隸刺舉無所避間
者何久濶京師語如此馳車下許章去節自豐始上書
擿章惡此舉誠可喜奈何少恩恕春夏常繫治人多訟
其短遂徙城門尉復列堪猛過上為之切齒制詔白其
罪不忍下豐吏豐初在朝時數道堪猛美失職乃自取

不內省諸已反感怨其他轉譽以為毀不欲加以刑上憐之老矣庶人終於家反覆豈可恥

新津退思堂

三江古劇邑入籍生齒夥詞源百端起區處不可惰子醇為之宰幽隱照必破斷事精且密有若麥歷礪尚懼忽一失退即此堂坐戾者思改易無使下罹禍如此凡二載不識有纖過賢哉令之師敢以此為賀

墨君堂晚晴凭欄

墨君堂中看新霽十里平林鋪淨綠青烟一去抹遠岸
白鳥雙來立喬木戴勝入園蠶已老栗留過隴麥將熟
坐待月破東嶺雲自取簾鉤更高軸

山舍早起探晴

山鳥轉晴日獨行風滿林澗花薰野袂岩水濺幽襟側
石驚新滑垂蘿愛近深蕭然此清興不似戴華簪

東谷獨往

久不到東谷晚晴欣細履陰陰夾路木漣漣落溪水幽

涎界屏粉亂喙刻窓紙兀坐忘所歸烟雲逼人起

西崦道友

西崦入深窅幽茅藏隱仙虛窓畫雲篆淨几校靈編絕
巘聳玉幹危岩瀉珠涎相留飭青餌人世凡幾年

送李野夫兼簡公擇與學士同年

吾友野夫官滿歸峽中風物正春時莫因道路起長歎
且對江山吟好詩異日滑臺君若到寄言別乘我相思
聲名已重更論底但引冰堂金屈卮

任居雲棲枝閣

我峩仙鸞山杳杳山上閣道傍問耕者居雲之所作居
雲倜儻士韁鎖不可縛讀書三十年議論寫不涸縱橫
入衆藝深曉不止畧自笑與世遠回首念岩壑安排事
幽隱終老期此託結茅層巒巔退比籬下雀棲枝榜其
號意豈羨鵬鶴時茲入岑絕寄憤滿寥廓江風拂危欄
澗月滿疎箔獨橫古溜琴居雲
琴名遠意追淡泊蕭蕭履霜

操隱隱天外落履霜居雲之
所好彈者飄揚雜仙籟泛響度林薄

其誰共高興唯此猿與鶴願言解塵纓一赴方外約

朱康叔郎中棄官求母於金州因會華清宮作

此詩送之

蟠桃實在枝蟠桃花已飛相隔五十春一旦還相依康
叔視金龜解去如糞土徒步入堯闢金州取其母古人
亦有此比之康叔難幾時有古人能如公棄官王蓮仙
宇中相會談此事使我發驚歎達曉不能寐借問侍安
輿輦下何時過我欲率諸君扶服詣門賀

蓬溪蘇令均利泉

潛流蔽荒壤嘉惠鬱所施邑人念遠汲視此無以為蘇
君作之令大利收前遺一日會衆鋪茲焉發清漪既已
就新甃瓶缶何罍罍盡言彼汙濁豈爾同甘滋比戶獲
美飲頌君皆一詞何以紀君德是泉無涸時

寃婦行

婉婉西隣女韶顏豔朝霞淑性自天與少小傳全嘉孝
愛親黨重巧慧間里誇其母最嬌憐者若眼下花自從

插冠笄未始離寃紗讀書佩箴戒舉止無纖瑕求媒不
自審得婿非良家如以瓊樹枝使之並蒹葭憶初行嫁
時遺贈矜豪華明珠蹙桂裙雜寶裝簪珥餘貲詎可數
但較輦以車其姑本寒種貪壑常鎔研得婦不問好求
索惟無涯侍奉四五年呌物逾餓鴟百欲一不應用毒
同虺蛇豈惟被詰辱抑亦遭笞撻使執賤役課責日
夜加手指盡禿瘃鬚髮仍彫彫一旦不任事病骨枯若
槎委頓臥在牀尚爾磨怒牙既死亦不顧但恣攫且擎

聞之道路人涕泗而咨嗟養女擇所適此事寧輕耶家
法要相委在通不在遐聘禮貴得中尚約不尚奢尊章
若慈仁至死甘苧麻請看西隣女一失千里差

林居

宿髮未暇梳林居且辰詣鮮暉散清滴濕濕滿衣袂仄
行蓋前礙傾視因遠翳野意浩盈懷曾忘傲公退

墨君堂

嗜竹種復畫渾如王掾居高堂倚空岩素壁交扶疎山

影覆秋靜月色澄夜虛蕭爽只自適誰能愛吾廬

鑑崖

山居有青崖
平滑如鑑

層崖瑩青瑤冷滑不可捫秋光發淨照林影搖晴暎飛
瀑滌吟肺垂蘿清飲魂惟憂漬愁霖碎鮮來相痕

宿超果山寺

荒途涉沮洳危嶺升坡陁愛此清淨居不倦來往多山
僧見余喜顛倒披乾陀引我坐前軒山果丹碧羅食已
步野徑新柔踏晴莎就石枕古稜依松執長柯是夕乃

宿此東山吐圓波夜久不能寐禽蟲伴幽哦達旦鳴落葉固非俗士歌岩猿與谿鳥應笑頻經過

富樂山海師

上人者何人富樂之禪客成都昔嘗見時已坐法席別來二十年嗟此出處隔昨過芙蓉溪捨櫟得携策盤盤轉危磴上叩金仙宅林間識孤標梵眼老愈碧引我翠壁下煮茗拂蘚石問之第二月雄辯發古譯無由從之遊不得蒙久益翻然入塵闐俛首愧名跡

彭州南樓

百尺壓城端飛簷欲上搏湖光搖埋塊山影轉欄干秀
野舍春煦喬林擁暮寒回頭大岷雪千仞玉噴兀

大慈交師演古軒

萬法一軒中周回百座容曲燃簷葛久橫揭貝多重信
士供晨鉢門人集午鐘何時聽雄辨幾柄換庭松

新晴後溪樹陰灑然覽景成韻

雨後溪水急晴光鬱如浮高林放繁陰黓黓幢蓋稠麥

熟桑椹好撩亂黃栗留咿咿動新蜩局局啼乳鳩晚策
貪靜境緩帶成獨遊照影俯回淵濯足臨漫流願言懷
世慮逐此蕭灑休定知今夕夢不作塵土憂

黃秀才北郊書堂

吾邑固僻陋嶺巒合羣山苟無賢者居孰能營幽閑黃
子治北郊勝絕收其間長溪斷谷口囂譁隔塵闕始至
甚夷曠漸往頗險艱洞穴烟雲昏澗壑松桂環幽芳自
芬馥野哢常綿蠻繚磴挂絕壁孤鴟飛遙灣氣象奪天

奧景物搜鬼慳築室貯羣籍軒窓面辱顏朱黃列几案
坐把古穴刪自取天爵高下視五兩綸處心固已定詎
恤時輩訕伊余素無似謬入文墨班前得省親歸屢此
容追攀時亦竊講議始蹈賢聖關譬之拉虎豹所得纔
一斑自愧鄙樸姿得涉道誼寢余亦有東谷對此何格
頑每來輒盡日須步明月還

讀楊山人詩

秋高羣山空衆籟吐天寂霜飈擊林野岩壑起哀號蕭

蕭寒月下合若萬鬼嘯疑是太古魂幽幽此中弔山人
住中嶼側耳得清峭譜之入文字滿卷冷雪照其聲太
淒楚勁溢皆古調俗尚正淫靡惑者自夸耀山人持之
歸無乃取衆譙會有知此音相逢當一笑

已師竹枝

已師竹奇竹坐亦不去手循摩瑩且膩瘦骨何蚴蟉叢
枝抱奇節兩兩相對走尋常出孤梢上下分左右如何
此獨異天產固非偶師初得之誰此實世未有不為師

所用亦共衆植朽願師勿棄置珍之比靈壽

晚至村家

高原磽確石徑微籬巷明滅餘殘暉舊裾飄風採桑去
白袷卷水秧稻歸深葭繞澗牛散臥積麥滿場雞亂飛
前谿後谷暝烟起稚子各出闋柴扉

雨喜客過

積雨無所詣十日不出屋故人念端居牢落如槁木高
軒過窮巷下馬想慰沃載酒酡揚顏裏飯飽桑腹日暮

從者散還尋舊書讀

墅居

不復入城市亂山圍一村雲霞供几席水石佐琴樽病
久筋力緩眠多頭目昏無人來谷口苔蘚上松門

東窓

叢榆落碎鈿蔓柳撲輕綿麗婉暗紅霧曲堤橫翠烟嘉
樹正陰合好禽新語圓東窓日已滿猶記隱囊眠

大雨

驚雲駕長風大雨灑九有崩騰百川倒豪怒一雷走芒
芒草木亂隱隱岩谷吼高閣晝眠人覺來但支肘

芹歎

清霜入寒溪水迹落一尺飛沙上芹葉脆卷如燎炙孤
根抱生意春澤守遺瀝願奉野人薦充君盤中寶

憂居

憂居向山林蟲鳥日為伍形骸乍摧剥骨肉慣辛苦蔬
盤羞客至病榻厭人語地僻誰往還閑門閉深雨

任氏鳴璫橋

清溪漱碧崖哀哀寒聲落子川愛溪聲架橋橫絕壁山
風撼松月倚檻聽噴薄遂號曰鳴璫古人無此作

過友人谿居

離菴接菰蒲閑扉掩自娛水蟲行挿岸林鳥過提壺白
浪搖秋艇青烟蓋晚厨主人誇野飯為我煮新蘆

江上主人

客路逢江國家占畫圖青林隨遠岸白水滿平湖魚

小猶論尺鷗輕欲問銖何時遂休去來此伴潛夫

詠月

見說樓臺滿玉波中間惟只鎖嬌娥可憐八萬二千戶
每到缺時爭奈何

五十

生平曾不事悠悠倏忽年華五十秋宦意文情俱淡泊

可憐渾似李蒙州

攬照

耻將哀晚競青春
強把圓波拂曉塵
自笑年來鬚鬢白

王昭不解作官人

梁景和

隋氏廷中列百官
幾人風節動朝端
越公事勢炎如火
獨有梁毗會忍寒

何桂林

十萬餘工造羽儀
夾堤浮浪去參差
堂堂送入江都去
渾忘當年攬頸時

傲吏

管馬心何在排車意自閑問時將手板柱頰對西山

閩州東園十詠

錦屏閣

茂林班若錦秀巘蠶如屏底處供登覽閑干在杳冥

清風臺

無時來見襲有地更臨高坐客清談起紛紛落麈毛

四照亭

畫箔褰何礙珍叢發已圓願公皆遍賞莫為一隅偏

柳橋

接風誇晚態垂雨怯春寒為問題芳意同誰倚畫欄

曲池

水似珠璫入池如玉磬開臨流唯自適魚鳥莫相猜

明月臺

微稜生海角圓魄到天心共上唯佳客無容照俗襟

三角亭

合棟交生角回欄互引牙由來因地勢不是故尖斜

花塢

繚繞穿紅萼爛斑踏紫苔誰將錦步障端為使君開

藥欄

玉笋齊抽日金釭競列時自然俱可愛莫放畫簾垂

郎中庵

已築環為堵仍裁月作牀公來時隱几身世在羲皇

丹淵集卷五

欽定四庫全書叢書要卷一萬四千七百九十四

集部

丹淵集卷六

宋文同撰

詩四十首

和仲蒙石龍渦

羣岡壓涇渭於此聚衆首其間石屋露遠視若呀口林
端躡組上却入勢愈斗圍空豎古壁闊可百人受洪鍾
誰倒仰巨甕忽側剖層岩寒泉飛絕巘怪樹走陰風喜

復怒野霧吞且嘔晴嵐逼衣襟欲住不得久嘗聞耕者
說自昔藏蚴螺當年救旱事有記刻不朽近歲靈恐歇
百禱無一偶至今閭里人不復來奠酒

和仲蒙山城

大歷年忠武居幽捍逆氏平民營板堵斷賊閑远溪連
櫓橫朱鳥飛檣切紫霓縈紆圍絕巘靡迤附深溪外濬
池隍險旁瞰堡障低轡輶防闇石埤塊礙雲梯樹杪鳴
巡鐸崖端響守鼙石頭何培壘龍首太醯雞歲久蒼

苔上時平白草齊全秦襟帶地惟此壯山西

和子山春日雨中書事見寄

二首

菀菀冥冥雨氣沉一春長是詠春陰燕歸畫棟簾櫳靜
鶯下雕欄院宇深闢草玉釵應復約看花金勒悞重尋
謝郎風調將誰奈獨倚書牀擁鼻吟

其二

青春已破六十日正好共携歌管遊鶯花有意欲惱亂
風雨何事相淹留南園綠柳映綠樹西湖畫舫臨清流

幾時雲陰得斂霽願把一樽相獻酬

馬子山為余與賀順之書記李仲蒙察推同年
同幕作題名記復有詩督程適之書石余因和
兼謝

太常舊得同科第幕府今還次姓名作記馬周文已贍
書丹程邈隸尤精定知二美能傳久從此三家覺轉榮
每對雄詞觀健筆自慚孤迹附羣英

官舍春日書懷

二首

自趨戎幕佐鞬橐四見新陰發舊柯學飲不成歡意少
好吟無倦苦心多舞傷池柳風圖甚泣破庭蘭雨奈何
敢對青春歎留滯且須開口更狂歌

其二

琵琶泉水碧溶溶又見春歸玉柱峯歡緒已闌羞老大
交期將近懶遊從杏開暖萼融紅萼柳放晴花拆白茸
賦得上林佳景盡不知誰為薦臨邛

登邠州城樓

試此望搖落秋襟成惘然客懷傷薄暮節物感窮邊斷
燒侵高壘微陽入晚川年來舊山意常與雁翩翩

秋盡日陪諸友登白佛閣

危刹隱高阜孤軒橫碧虛登臨賞秋杪笑傲樂公餘野
外景入畫坐中歡可書重城已嚴鑰歸馬尚踟蹰

極寒

燈火宜冬杪圖書稱夜長簾鈎挂新月窓紙漏飛霜酒
醴慙孤宦皮毛逐異鄉誰知舊山下梅艷滿東牆

謝惠橘

細葉隱朱實纍纍楚江深
寒香摘清露奔走寄迢遞
琳腴滿金殼咀嚼想佳惠
君未致此時風已吹削肺

登山城書事

節物感羈旅連空生塞陰
亂鴻寒渚遠羣雀晚叢深
霜重涇灘出烟高龍樹沉
歲華徒自老幽憤滿登臨

送夏殿直

時婿於李璋太尉

霜樹東門曉清寒滿客衣一樽從此別百兩幾時歸
漆

水魚初薦梁園雪正飛
高堂今遠郡須念報春暉

送錢規判官歸蜀覲親遂之岳陽

嚴風吹玉柱有客動歸裝
古道轉危阪全家行曉霜
休嗟遊薄宦且喜拜高堂
會合知何所春江泛楚艎

和梨花

素質靜相依清香暖更飛
笑從風外歇啼向雨中歸
江令歌瓊樹甄妃夢玉衣
盡堂明月地常此惜芳菲

山櫻

巖壁自叢叢年華寂寞中偶因移曉雨似欲占春風嫩葉藏輕綠繁葩露淺紅孤根知幸否從此對雕櫳

秋子

裊裊復翻翻封條壓樹繁羣芳非姊妹亂實見兜孫蔭日臨虛檻披風拂短垣主人無奈爾常為醉幽軒

桃花

種近短牆邊開臨小檻前倚風無限意笑日有餘妍枝輾圍深密芭穠墮碎圓祇應芳樹下時見武陵仙

杏花

仙杏一番新，妖嬈洗露晨。待粧憂粉重，欲點要酥勻。
淡斜分影池，清倒寫真君。須憐舊物曾伴曲，江春。

秋日寄呂永壽徵中

落日照容谷，寥然官署秋。開簾臨絕巘，凭几對寒流。古
意深中得詩思，靜外遊三年。多少景滿篋，是冥搜。

吟春

春工運潛巧，是處有行迹。庭梢發新穎，巖溜融暖脉。晴

湖影撥刺曉樹音格磔須知玉峯下日有尋芳客

琵琶泉

險道入幽邃深溪轉岑寂蒼烟鬱孤岩秀石圍斷壁古
蘚甃碧潤寒泉灑清滴誰能厭塵襟茲可供洗滌

和子山種花五首

風流從事季長家遶徧官居種盡花應為清才無比敵
擬將文彩競春華

其二

碾薄撓圓粉色勻一枝寒艷惱青春曉來帶雨西廂下
恰似蓬萊見太真

其三

曾宴瓊林爛熳紅寶津樓下看春風今朝忽向君家見
猶憶當年醉眼中

其四

幾樹山櫻曲檻前花開如火葉如烟待將短句誇形似
已被休文道欲燃

其五

新自涇州趨雨移便開繁萼擁芳枝紅霞照地清香起似到玄都觀裏時

和張屯田雪中朝拜天慶觀二首

簌簌遙空墮碎瓊一街寒色曉風清題輿想入簫臺下似駕飈輪向玉京

其二

寶幢珠節共玲瓏九虎嚴闕有路通遙望玉宸端象簡

宛然身在廣寒宮

送酒與呂令答所示詩二首

君無彭澤五十畝
我有謫仙三百盃
聞道山中足春意
滿壺聊為撥新醅

其二

見說西溪裏羣花艷
正繁不知紅影下誰共醉芳樽

初雪

一色陰雲蔽曉空
粉英瓊屑亂茸茸
不知遊騎將何處

已失南城玉柱峯

對雪獨酌

雲陰低重玉花繁獨擁貂裘對一樽不語佳賓是何物
古書名盡滿西軒

槐莊渡口

雲烟飄泊樹微茫一岸人家帶夕陽欲上高原便回首
可憐風物似吾鄉

約春

去歲相違恨已賒
今年相遇喜無涯
紅情綠意知多少
盡入涇川萬樹花

和子山陪使君遊西湖三絕正月晦日

柳色遶堤金粉明
湖光浮岸玉烟輕
風柔日薄恰新霽
正好訪春來此行

其二

遊騎翩翩從使君
娛賓亭上宴西曛
座中不用頻辭酒

明日青春已一分

其三

滿眼垂楊照綠波就中春意此先多不將歌管酬佳景
擬奈翠漪堂上何

探春

幽郊寒重勒春遲消息如今尚未知只是垂楊最先得
每朝來覓向東枝

春寒

東風何事力猶微凜凜邊寒犯客衣舊雪未消新雪下

南園春色幾時歸

丹淵集卷六

欽定四庫全書叢要卷一萬四千七百九十五

集部

丹淵集卷七

宋文同撰

詩四十首

新秋讀書

高風發遠籟轉響爲清商
隆曠減炎威未晚先自涼庭
前碧桐樹昨日聞早霜朝來逐葉上已暉一拂黃壯歲
覺時節燿若翻電光自顧勿嗟惋徒然攬中腸官居幸

少事署案日幾行公退清且閑垂簾坐虛堂解帶輒傲兀左右羅縵綯所務唯討論一燈從夜長

貧士行

側身入窮閭跼影守環堵日高齒未嚼風勁骨猶露胡為迫凍餓此道吾所素出每駕雞棲歸仍伏龍具原生本非病董子蓋不遇誰將斗升水活此轍中鮒不見糧人欲死者亦屢徒自諷詩書區區立名譽

馮氏道中早行

畏暑事晨役高原動征羈遙歷廣博浩浩長風吹疎
星才出沒河漢西南垂林端啟明上飛光發丹曦熒熒
洒晴露百物含華滋爽氣入肝膈宿濁無一絲寒泉漱
清甘洗滌俗慮遺還憂火輪怒萬里燒雲達

宿李同年蔭碧亭

時自長安

慮因屬疾

抱病出煩闐投此青林間高軒得清涼坐致精爽還主
人止之宿借與終南山中宵皓月起繞枕皆辱顏望久
氣自清心胷無結頑平明又西走勝軌不可攀

李生畫鶴

昂昂青田姿杳杳在輕素一身萬里意雙目九霄顧
鈔羽翮利竦竦骨節露君初本誰學我恐必神悟得於
想像外看在絕筆處稷筌如復生相與較獨步

幽州

昔年戎馬盡南幽今日風光已太文雅吹夜喧金府月
靚粧春艷玉峯雲泉亭柳色濃將滴水寨荷香遠更薰
邏候不驚烽燧息高原閑獵舊將軍

寄友人

惟秦抵於蜀間可歷萬嶮遙懷嚮英義潛想一夕馳之
人探道奧求合常苦奇羈音見謂可招納欲與相墳築夫
何屢乖絕出處各一涯秋風動孤況西首勞所思

和仲蒙夜坐

宿鳥驚飛斷雁號獨凭幽几靜塵勞風鳴北戶霜威重
雲壓南山雪意高少睡始知茶効力大寒須遣酒爭豪
硯冰已合燈花老猶對羣書擁敝袍

明教院

野逕欹危入谷斜曲峽回嶺共交加經年不到為隔水
此日獨遊因看花兩岸烟雲閑景物一軒泉石靜生涯
自憐冠珮嬰身者直入樊籠老歲華

和仲蒙夏日即事

簿領初休几案清西軒移枕卧前楹香從菡萏紅芭發
粉入簷簷翠節生不分去聲便衰聞蟻鬪可嗟俱妄見蝎

爭日長景靜官曹冷莫厭頻來對一枰

西軒秋日

官舍蕭然似隱居一軒秋色伴恬如深藏宿雨樹木暗
高灑夕陽籬落疎景物靜思臨水石光陰閑覺入圖書
此心只有雲相信長伴吟魂遙太虛

和張屯田秋晚靈峯東閣閑望

直欄橫絕紫微陰凭久秋光照客襟一道山川寒色遠
萬家烟火夕陽深涇灘水落羣鷗集秦嶺雲高斷雁沉
此興浩然須把酒可憐難醉異鄉心

春庭

春院陰陰翠靄低春庭寂寂曉光迷花間蜂去抱黃粉
苔上鶯來銜綠泥兩行高梧初蔭合一畊新草恰生齊
微禽已識幽人意飛下欄干向裏啼

過永壽縣

驅馬上危坂暮鞭搖客愁峯巒驚滿目咫尺擬回頭紅
樹擁野店白雲藏縣樓須知此北下地底見幽州杜老
有幽

郊入地
底之句

東谷偶成

府事幸稀簡常為東谷遊舊山茲勞歸佳景每遲留斷續溪雲起縱橫野水流拂衣知未得聊此慰鄉愁

宜祿昭仁寺後軒

危欄憑絕壑欲奈此時何但有夕陽處就中秋色多與誰同徙倚空自發吟哦便覺成羈旅歸心逐雁過

過高塘城

頽壁乍高低中間已亂蹊長原想鵝鶴大塚記鯨鯢黯

淡寒雲結蕭疎野草齊興亡盡遺迹立馬看扶犁

夏日翠漪堂

湖水碧溶溶寒漪四望通
龜魚遊浩渺鳬鷺下虛空
氣吟窓外清光釣艇中一襟時自快多謝北軒風

玉峯園經春不得一過因成詩呈同官約遊

春來少嬉遊俗事日相耗南園只城外累月不一到花
香雨後歇樹色風中老惟有嵒下泉猶能滌幽挹

送張兢無悔秘校赴調

無悔富道誼卷藏無所施端笏拜上官十年走階墀人
皆為嗟惋君獨安且怡又執考書去當衡誰與知

六月十日中伏玉峯園避暑值雨

南園避中伏意適晚忘歸牆外谷雲起簷前山雨飛興
餘思秉燭坐久欲添衣為愛東嵒下泉聲通翠微

咸陽道上晚晴有作

積靄晚盡散南山明夕陽秋容徧豐鎬古恨入隋唐草
木咸搖落風烟自渺茫客亭須下馬把酒慰殊鄉

歲晚登清素院北閣

雲端訪古寺樹杪臨危閣風厲憚草木霜乾喜鶻鶚天
時既悽愴人意亦寂寞回念故山遠心隨日西落

炭泉險道

一澗呀然截亂峯更於何處問途窮高深出井又入井
曲直上弓還下弓絕底乍臨渾逼仄危顛纔徹似飛沖
我來行縣須經此正在炎炎三伏中

玉峯園避暑

伏日當飲酒南城會羣賢開樽蔭碧樹移席臨清泉浩
意脫塵土高懷軼雲烟早歸休信俗須待月娟娟

早起覽物成詠

移枕出幽幌披衣步前楹秋容草木靜曉氣烟雲輕
蟬噪宿露滴雁飛朝霞明塵心幸未動聊此納餘清

寄馮永州

山水永最善守居聞更優烟雲萬石古風月九岩秋几
案少俗事壺觴多雅遊無因陪後乘幽意滿湘流

暑夕待月庭下夜深方歸

晝蠅方少夜蚊多，搖脫霜紈奈熱何。
獨向中庭待明月，一身清露瀉金波。

中伏日諸君會玉峯，余以病不預作詩寄呈。
去年中伏在南園，同聽清泉引綠樽。
今日諸君又高會，獨嗟移疾臥西軒。

興平原上赤熱因寄永壽同年

日午終南翠色燃，滿襟飛土下秦川。
是時獨想君高尚。

正在山亭弄野泉

亭口

林下翩翩雁影斜
滿川紅葉映人家
岩頭孤寺見橫閣
有客獨來登暮霞

淺水原

鷁舡西北地鱗鱗
此處當年起戰塵
見說如今溝壠下
斷鋒殘鏃屬耕民

興平原上

東西車馬走秦川擾擾飛塵混曉烟我亦中間遊宦者
尚慚無語賦歸田

西湖荷花

紅苞綠葉共低昂滿眼寒波映碧光應是西風拘管得
是人須與一襟香

石龍渦

嶮勢圍空斷壁圓四時常見聚雲烟為霖救旱今何在

徒有遺文記昔年

有李懷人記備述
禱雨有驗之事

水漢

紅芳宵露清翠節曉霜犯雨後曠殘日秋容滿庭檻

黃蜀葵

錦江何日別漆水今朝見清露染顏色秋鵝一分淺

千葉鼓子花

柔條長百尺秀萼包千葉不惜作高架為君相引接

鄖上懷古

未曉南山去從禽夜不歸九行多少地十二所更衣

石竹

蜂鬚紅紫爛蟲啼碧叢短秋風畧地起惟有蒼苔管

丹淵集卷七

欽定四庫全書會要卷一萬四千七百九十六

集部

丹淵集卷八

宋文同撰

詩五十一首

邛州東園晚興

公休時得岸輕紗門外誰知吏隱家
鬪鴨整羣翻荇葉
乳鳥無數墮松花
攜琴秀野彈流水
設席芳洲詠落霞
向晚雙親共諸子相將來此樂無涯

秀野芳洲
二亭名

雨過側調

陰車飛空載急雨
雨過林塘若新換
煙花浮波魚誤食
松子落屋鳥驚彈
白雲挂樹久不起
青煙泊草殊未散
東園傲吏愛高竹
把卷倚風頭髮亂

題象耳山寺

轉谷紫巖路始窮
隔林遙望一門通
溪山俱在見聞外
臺殿盡藏懷抱中
像閣果恩明海日經
幢瓔珞撼天風
勞生又逐輕舠去
珍重高僧解苦空

題晉原舒太博清谿閣

危閣飛空羽翼開下蟠波面影徘徊光搖畫板月深淺
聲遠曲欄風往來暝色四郊煙莽蒼曉雲千嶂雪崔嵬
主人好事民無訟日夕登遊對酒杯

縣樓獨酌

向晚無公事身如太古閒縣樓明夕照樽酒對南山放
意利名外遊心天地間生來不能飲到此學酡顏

殘秋郊外

蕭蕭風色美寒威見盡郊原向晚暉昨夜星霜和月落
浦林紅葉隔煙飛已嗟北渚蓮初老更惜東籬菊漸稀
休感歲華傷節物眼前樽酒重相違

郊外

城市厭塵土高原聊振衣晚雲多淺碧秋樹半深緋江
氣雜輕靄山光明落暉因成求好景更就野橋歸

靜林詩僧已老

七十吟中老清風滿舊林倚筇秋岸遠圍衲夜房深未

得雲空在將成月已沈生平苦如此誰是識師心

高堂山兜率寺

孤絕不可狀此山餘舊聞因官多暇日與客到深雲門外一塵斷座中千里分勞生當自去繚繞下西曛

閒居院上方晚景

繞岩縈谷到禪扃更上危顛最上亭風攬亂鷗盤古木雨催羣鶩下寒汀秋田溝壠如棋局晚岫峰巒若畫屏詩已就成終夕去遠村燈火一星星

李道士惠琴軒集 二首

驅役精魂入大幽。滿編竒絕盡冥搜。
不教天地畧容隱。應與鬼神同訪求。
海藏光芒開寶玉。羽林鋒刃立戈矛。
蕭臺自好携歸去。莫向人間苦暗投。

其二

壽寧孫老畫壁下。當日偶同君此行。
是時衆裏畧一揖。自爾乃得君。
詩名風馳雨絕十五載。此地忽爾相逢迎。
見投琴軒兩大集。寶匣金鑰緘瑤瓊。
未開試使道所有。

毛髮寒豎肝膽驚歸來燒燈讀至曉句險字硬才力獰
君身長不滿三尺萬象何術獨手擎嗟我氣俗音韻淺
不敢與君相和聲去鳴聊書短歌報佳惠它日願將朝七

瓊

彭山縣居

公館靜寥寥園亭景物饒溪光明短約樹影蔭危譙山
鳥忽雙下池魚時一跳主人王事簡文酒日逍遙

下金雞山

峽束幾重煙山分數尺天巖猿與溪鳥一似過飛仙

過金雞關

關頭氣象古關下風煙淡春深草木活嵐重坑谷暗禽
聲著部奏花色成窠勘歸鞍雖若水留此亦能暫

夜靜獨登小閣有所見因書

危閣橫空蔽野扉夜深來上久忘歸水光歛灑和煙動
雲色離披夾月飛隔岸葦村聞笛遠背灣松塢見燈微
此間自得吟中樂不覺霜華滿盡衣

送黃夢得

去年輕舡過巫山
今日羸驂度劍關
孤客每嗟隨斷梗
慈親常把夢連環
蘭陔歲晚雖堪采
桂窟春深正好攀
決取榮科歸舊里
板輿迎侍且承顏

送郭方叔南充簿

六月東山道炎風
滿去鞍蹕周之舊里
仇覽此初官簿領
無煩壅圖書好燕安
清朝名路闊慎勿學長歎

送張郭二秀才赴舉

二子共齋刀翩翩去意豪負才皆萬選入手定雙高上
道梅薰袖還家草映袍須知本鴻鵠終不在蓬蒿

謝人寄蒙頂新茶

蜀土茶稱盛蒙山味獨珍靈根託高頂勝地發先春幾
樹初驚暖羣藍競摘新蒼條尋暗粒紫萼落輕鱗的皷
香瓊碎盤鬢綠薑勻慢烘防熾炭重碾敵輕塵無錫泉
來蜀乾峰盛自秦十分調雪粉一啜嚥雲津沃睡迷無
鬼清吟健有神冰霜凝入骨羽翼要騰身磊磊真賢宰

堂堂作主人玉川喉吻澁莫惜寄來頻

謝許判官惠茶圖茶詩

成圖畫茶器滿幅寫茶詩會說工全妙深諳句特奇盡將為遠贈留與作閑資便覺新來癖渾如陸季疵

雨後看山因憶黃世南先生詩以相招

新霜夜落羣梢鳴羣風刮天為早晴南山向曉盡張列額嶺斷壑當空橫開軒一見喜無量走上高閣臨飛甍層欄倚遍不能下狀貌秀活圍雙睛奔騰遠近若波浪

愛極擬去中間行此時只恨少佳客相共叫笑誇崢嶸
我思黃子者竒士趣向超越無俗情手提詩筆若椽大
到處詠物物有名我今此縣頗幽僻復在歲杪天氣清
溪中魚蟹易尋覓林下梨栗新收盛子如訪我住旬浹
此品可備盤與觥遂馳僕馬去邀子願子為我聊出城
私心不獨徒見子亦願播此山之聲子如不見不為詠
可惜此山虛此生

送楊議卿赴舉

寒日照殘樹新霜結衰草有客奉高薦策馬奔遠道聲
名近轉大文字素已好壯歲雖可恃榮科亦宜早勉自
報春暉高堂親髮老

和楊仲軒春難度

三首

春難度紅梢梢綠縷縷朝披煙暮結雨勸君飲酒莫用
訴春難度

其二

春難度歌滿閣酒萬舉喉欲破腸欲腐風光滿天已不

暮春難度

其三

春難度池浮花牆擁絮枕書睡樹陰午日長幾何萬尺
許春難度

和何靖山人海棠

為愛香苞照地紅倚欄終日對芳叢夜深忽憶高枝好
把酒更來明月中

訪李奐山人隱居

多暇無所適故來尋隱君寒開壓屋樹觸散擁門雲狀貌不妨古言談何太文令人重高趣歸去每斜曛

冬晚書事

倚杖立亭臯寒威向曉豪雪乾山色老風烈樹聲高殘日千鶴舞孤雲一鴈號自然成感物不覺首重搔

晚次江上

宛轉下江岸霜風繞人衣翩翩渚鴻墮冉冉林鷗歸前壑已重靄遠峯猶落暉孤舟欲何處劃浪去如飛

十月梅花

十月凍牆隈
英英見早梅
應從九地底
先領一陽來
紫膜紛紛脫
黃膚迤迤開
得風渾自變
與雪欲成堆
細暈輕檀口
濃粧膩粉腮
月娥身解寫
青女手能裁
冷艷浮冰沼
清香落玉杯
只憂融乳酪
不惜露瓊瑰
避妬情堪重
禁寒術可猜
有誰憐寂寞
盡日獨徘徊
共語誠無計
將題恥不才
東隣夜夜客
莫放笛聲哀

吉祥院

欹危一逕通下馬轉深叢便是塵寰外可憐煙塢中修
篁寒滴雨老柏靜吟風日暮庭前樹歸鴟自遠空

書鶴鳴化壁

晚氣陰陰別作寒夕陽林下動歸鞍忽然人報後山雪
更上上清宮上看

題鶴鳴化上清宮

秘宇壓孱顏飛梯上屈盤清流抱山合喬樹倚雲寒地
古芝英折岩秋石乳乾飈輪遊底處空自立層壇

寄題何靖山人隱居

門外鋪寒水牆頭立好山先生忘勢利高隱寄中間鳬鶩應同樂煙雲已共閒幾時能少暇携酒到松關

寄楞嚴大師

錦官城裏寺一室若雲峯水縮秋吟鼎霜低夜講松住
齋塵入鉢出定蘚生筇曾聽三摩義居常夢曉鐘

揖山閣

一問此孤高蒼蒼欲上摩有時臨縹渺盡日對嵯峨絕

底秋陰重危層晚照多無由從隱者空自愧雲蘿

杳杳堂

杳杳堂何者余常此養愚放身依曲几忘慮若枯株莊老題書冊喬松列畫圖客來休見問非爾識于于

安仁道中早行

行馬江頭未曉時好風無限滿輕衣寒蟬噪月成番起野鴨驚沙作隊飛揭揭酒旗當岸立翩翩魚艇隔灣歸此間物象皆新得須信詩情不可違

竹閣

回廡抱層閣蕭然深且虛畫欄憑曲曲高竹愛疎疎塵
滓外不到衣襟清有餘每來聊自適幽意滿琴書

尋春

馬行如疾輪十里去尋春盎盎日光麗鮮鮮雲色新樓
臺出花木道路夾松筠欲買前村酒陶然作醉人

太博孫公遊火井因寄

七盤雲道與雲浮下見高林壓縣樓覽景莫能陪後乘

臨風空自憶前遊已聞去日謀詩席更羨歸時就釣舟
好句定知酬不得盡將奇詭入冥搜

墅居

林下覽清曠此懷殊不羈散行輕幘便獨酌小甌宜自
可追三樂何須作五噫世情歌笑外紛擾竟何為

面川亭

幽亭最孤絕直入亂叢間近晚獨來此有誰相與閒卷
簾通大野臨檻數前山便欲教携酒陶然踏月還

南亭

晚衙初散吏人歸獨立南亭著道衣淺酒小詩聊自樂
此心渾欲外輕肥

北郭

繞樹垂蘿蔭曲堤暖煙深處亂禽啼何人來此共携酒
可惜拒霜花一谿

讀史

不得榮陽遂失秦始知成敗盡由人可憐一擲贏天下

只使黃金四萬斤

夜學

已叨名第雖堪放未到根原豈敢休文字一牀燈一盞
只應前世是深讐

畫眉禽

盡日閒牕生好風一聲初聽下高籠公庭事簡人皆散
如在千岩萬壑中

鶯

濃染羽毛深畫眉曉來風日正晴時只應自道新聲好
啼遍後園花萬枝

佛頭地名也此中山水絕佳

公暇常來此處遊碧波蒼巒解相留翩然又向城中去
回顧溪山只自羞

丹淵集卷八

謹案卷七第三頁前八行猶對羣書擁敝抱刊本
敝訛敝今改

卷八第二頁後五行城市厭塵土刊本厭訛壓今

改

第五頁後一行入手定雙高刊本手訛守今改

總校官庶吉士臣侍朝

校對官編修臣閔愽大

謄錄監生臣沈啓晉

欽定四庫全書叢書要

集部

丹淵集卷九至十二



詳校官助教臣常循

欽定四庫全書叢要卷一萬四千七百九十七

集部

丹淵集卷九

宋文同撰

詩三十五首

和子平弔猿

去年汶山花平僧求得匡猿遠相寄來時野性已馴熟
趨捷輕便殊可憲呼來遣去會人語一成已絕歸山意
置之眼前看不足解去條索令自恣月明木杪倚風嘯

天暖花陰向陽睡兒童圍繞賓客惜倒挂橫跳衝嬉戲
叅夫每日費提舉未始時節虧飲飼前時忽來報之病
抱立階前自臨視與之柿栗不肯顧局腳埋頭交兩臂
毛焦色暗肉攣縮斗覺精神變憔悴尋常忽然遇小疾
不過蜘蛛噉三四咽喉才下即無恙何此不効況頻斛
今朝霜風冷入骨早遣之間云已斃人情不免為傷怛
退自悔恨中且愧重巒複岫本其樂大薄長林違爾志
若將韁鎖強維繫不完天年良有自遭人包裹瘞深僻

不使筋骸屬螻蟻。西隣子平最好事，聞之搏髀歎無已。
再三慘怛來訪問，歸作長篇踰百字。其詞讀之甚悽愴，
亦謂悒鬱歎其死。復推物理，重相慰聚。有散無皆偶爾，
把之庭下讀。復讀仰望高株一歎歎。

和子平悼馬

生來未嘗畜良馬，近得此駒誠可嘉。骨節權奇毛肉好，
此種無乃真渥洼。健蹄駿駿穩而疾，歷目一過如飛霞。
自歸官下少出入，惟是芻粟意轉加。前時相期好天色，

往返百里馳平沙誰謂兵奴跪其足針烙熨裏成瘢痂
立多氣毒憤入肺雙腫攢縮兩鼻呀庸工謬藥久不効
倒死櫨下鬃影鬆散惟一區瘻以贈惜爾命薄如萎花
子平平時最愛爾對客滿坐常洪誇今朝見爾忽斃蹠
重以好詩形歎嗟嗟余逐貧官職小此馬豈合居余家
從今但只跨欵段壞轡破鞍仍短韁

冷餅

海南有陶器質狀矮而滑云初日炙就鍛鎔不以火水

壺醜突兀酒瓶肥磧砌山罍頸微腫石鼎足已跛圓如
鴟夷形大比康瓠顆華元腹且皤王莽口何侈蕃胡入
中國萬里隨大舸携之五羊市中匱費包裹侏離講其
効瀉辯若炙蠅課以沸泉沃冰雪變立可炙敵療中渴
其用豈么麼君凡幾錢得不惜持遺我曾將對住客屢
試輒亦果勿云遠且陋幸可置之左

中秋夜試院寄子平

憶初我來時夜色如墨障心常念明月幾日西南上松

稍倚樓角一玦偃相向漸見輪中物依稀吐形狀今宵
東嶺外灔灔金波漲人間重此夕一歲號佳賞而我督
秋試鑠宿密如藏細務紛滿前約束甚鞭鞅無由奉朋
侶徹曉坐清曠之人富才華筆力趨且壯誰陪把樽酒
露下與酬唱南牆咫尺地使我起遐想人生此良會可
惜已虛放獨立中夜歸俛首入書幌

贈城南觀音院菴主廣師

薄領日嬰薄紛然汨幽襟駕言出城南聊欲清此心平

岡見淨刹石逕鬱以深中有苦空人峭健奇骨森十年
一菴下形迹了莫尋兀如擁敗褐口吐衆妙音時下寂
照堂聲絕響亦沈默矣蓋自得其誰知少林

送韓震都官監渭州酒韓近悼亡

士師每失官未始有憂愠園吏既喪婦何嘗復嗟憤二
子道義勝一與天理順之人乃其徒心迹兩相近區區
赴窮塞而使賣官醞胷中浩然者俗口不得問好軍此
開府遇士以恩信若訪禦戎策請為講三陣時仲儀帥
渭

成都楊氏江亭

汀洲煙雨卷輕霏遙望軒窓隱翠圍萬嶺西來供曉色
一江南下載晴暉鳬鷗慣入閨干宿魚蟹長隨舴艋歸
我亦舊多滄海思幾時如此得苔磯

漢州王氏林亭

短杓疎籬入野扁竹烟松露滿襟清奔湍激險飛寒響
弱蔓穿深挂晚英惜去更觀曾畫壁記來重注舊題名
門前便是紅塵道誰肯同過洗俗纓

春雪呈知府龍圖

朧朧玉魄沈霄彩簌簌瑤花破曉陰和氣所蒸緣異政
豐年之兆慰羣心畫樓卷白歡聲洽遊騎障泥樂意深
太守安閒民訟息錦城無限好園林

同蘓秘丞子平登延暉故亭

城端有亭餘故基吏曰舊榜題延暉行穿蒙籠倚孤陴
霜風飄蕭吹我衣高林滿郊目四圍雲起日落晴烟飛
感今念往聊久之埤堦昏黑羣鴟歸

金桃

雨染烟蒸萬實垂丹硃為骨菊為衣客疑麗水新淘得
人向瑤池舊帶歸只恐壓枝星欲落最憐和菜露初晞
銀瓜玉李君休並此品仙家亦自稀

房公湖

一頃清波四面平宛然唐相舊經營高秋林木形容老
落日樓臺綵繪明有景可尋蘭櫂遠無幽不入竹橋橫
二年所得官居樂肯厭頻來緩帶行

錦雞

高原濯濯美春暉金碧冠纓綵繪衣石溜瀉煙晴自照
巖枝橫月夜相依有時勃窣盤跚舞忽地鈞輶格磔飛
寄語人間用繒繳瑤臺鸞鳳好同歸

竹梭

秀榦扶疎綵檻新琅玕一束淨無塵重苞吐實黃金穗
密葉圍條碧玉輪凌犯雪霜持勁節遮藏烟雨長輕筠
此名未入華林記誰念西南寂寞春

無為山寺

一烜危磴遶崢嶸上徹幽深入化城烟外川原誰繡畫
雲中樓閣自陰晴老僧高論都無著古佛真身宛若生
聞道軍持新呪水願傾涓滴洒塵纓

劍州東園

羣峰高擁碧嶙峋亭宇清華氣象新雨岸烟雲先向日
一林花木暗藏春溪明夜閣軒窓月風斷晴橋井邑塵
好酒滿樽詩滿軸主人曾不倦行人

運判南園瞻民閣

青都高與紫霄通
獨此危欄望不窮
萬嶺過雲秋色裏
一峰擎雪夕陽中
欄檻曉落天倉月
牕戶晴吹石闕風
民吏安閒財賦足
管絃時復在層空

讀淵明集

吏人已散門闌靜
公事才休耳目清
牕下好風無俗客
案頭遺集有先生
文章簡要惟華袞
滋味醇釀是太羹
也待將身學歸去
聖時爭奈正升平

張次公太博歸閬中

制詔頻來試玉京清途猶自滯豪英策高三道竟何用
恩拜二親方爾榮嵇阮襟懷終曠達儀秦才術本縱橫
閬中勝事知無限且向城南爛熳行

寄成都監庫石屯田遠叔

一年同住夾城中小圃高齋幸見容吟盡物題春唱和
講窮人事夜過從尋芳待去門前約訪古邀回道上逢
別後西樓不堪倚滿川林木暮雲重

宿隆平精舍

萬木羅青蓋雙峰敞翠屏風埃愁客路鐘敲喜禪扃下
馬穿蒙密隨僧入杳冥俗襟如見濯試為瀉銅餅

弭蓋亭

弭蓋長亭下軒窓慰客心田塍交遠日水堋瀉清襟北
道雲千里西山雪萬尋塵衣無奈拂去騎復駿駿

什邡道中

驅馬下遙川殘陽促晚鞭高林夾廣道亂水入平田村

落晴如畫桑林晝起烟飛鴻正南下歸意滿雲邊

夜思寄蘇子平秘丞

亂竹敲風遠高松過雨涼檢書防落燼下幕恐遺香好
月娟娟上輕雲冉冉長端令阻佳客不得共清觴

西湖

丞相淹回地光容滿落暉池塘存舊夢城郭歎前非煙
靄陰晴出鳬鷗遠近歸松風殊有意猶欲下金徽

猿

岷嶺高無敵來從第幾層攀緣殊不倦趨捷爾誠能晚
嘯思危石晴懸憶古藤王孫非汝類只可以文憎

幽沼

促促開幽沼涓涓引細渠無由安島嶼才可活龜魚秀
荇新宜食圓荷淨好書時來坐高柳濯足蔭扶疎

步月

掩卷下中庭月色浩如水秋氣涼滿襟松陰密鋪地百
蟲催夜去一鴈領寒起靜念忘世紛誰同此佳味

中秋對月懷寄鳳凰山鄧道人

有客千巖萬壑中
綠牡丹臉紫方瞳
不知今夜西樓月
幾處飛仙下碧空

秋日晚晴呈同院

秋風淅淅吹碧虛
白雲鱗鱗如卧魚
共君今夜賞明月
興來誰欲騎蟾蜍

戲呈鳳凰長老用師

七十頭陀會語言
舌根流利口闌珊
羅浮居士最難奈

穢把無絃琴與彈

郡學鑠宿

長栢高柂蔭廣庭夜涼人靜夢魂清不知山月幾時落
每到曉鐘聞雨聲

子平墓負茶墨小章督之

睡憶建茶斟濺灑思充墨潑淋漓可憐二物俱無有
記得南堂墓勝時

長安李晦叔醉老菴

醉老名菴晦叔為菴中長是醉淋漓扶頭未得日過午
門外萬端俱不知

和邵興宗棊聲

二客與棊酬寒聲滿側楸急因隨行發斷為見遲休花
下鶯翻翼林間鶴轉頭丁丁竹樓下不獨在黃州

欽定四庫全書會要卷一萬四千七百九十八

集部

丹淵集卷十

宋文同撰

詩三十二首

續青城山四詠

昭慶觀

琳崖盤玉霄彩翠接步武雲霞不可盡泉石固難譜神
幢逾百尋帝轍歷萬古靈瀑誰與窮長飛六時雨

天倉山威儀觀

羣峯削瓊瑤老蘚抹古綠應朝大嚼去簪笏儼相逐珠
宮秘仙仗錦笈藏寶籙上帝此為倉其田堪種玉

飛赴寺

平林露層巘上獨置孤寺羣仙馭飛駕往往赴於此風
高幡影亂日落鐘聲起誰可謂詩豪興來吟萬紙

香積寺

道險轉詰曲山深愈墳屹行松耳目清入竹襟袖寒殿

閣紅芙蓉巒碧琅玕高僧把金字擁衲對雲看

夏秀才江居五題

枕流亭

愛此煙景佳開軒故臨水晴暉照寒浪飛影動牕紙倚
檻見魚游卷簾知鴈起憔悴笑湘累區區詠蘭芷

聞碧亭

雨餘山景鮮風定水光好晴陽破宿霧秀色濃可掃平
時一樽酒野客共傾倒朝暮山水間年華不知老

天隱洞

層崖削青瑤誰昔此鐫鏤潭潭闢孤洞中可百人受贊屹
列岫繞沟湧大江漱虞卿方著書入此幾年就

直鉤磯

盡知人釣曲獨見君釣直年年此磯上萬掣無一得持
竿只自苦吞餌何嘗識試効人所為君魚不勝食

醉經庵

垂茅緝為庵有類穹廬形之人伏其中日醉乎羣經世

俗安爾知但謂長不醒寄此語二豪渠非彼劉伶

寄題杭州通判胡學士官居詩四首

鳳味堂太史書言官居在鳳凰山下此山真
如鳳有雨翹翹止各建一塔而鳳觜正落所
居池上舊有一堂在山欲落處近葺之謂之

鳳味堂因而求詩

四詩為子瞻賦今易以胡侯
立黨禍未解故竄易失真歟

胡侯外補來錢塘所居之山名鳳凰不知元本發何處
蛇頸魚尾盤高岡婆娑欲下大江飲萬里一息頭低昂

誰將屠蘇壓兩翅直使帖地不得翔前人眼俗不知顧
會有賢者來形相憐汝困欲共汝語故近汝味營斯堂起
居飲食不離上外孰有耳聽琅琅應云汝德未衰在旦
暮可起鳴朝陽

濺玉齋又言山上草中多恮石近取得百餘
株於東齋累一山激水其間謂之濺玉齋

石林

閻

森座隅激水注射成飛渠寒音琤然落環珮
爽氣颯爾生庭除主人清標自可敵底處勝槩為能如

想君不欲時暫去其餘滿案堆文書

方庵又言堂後有屋正方謂之方庵同按釋

名庵園屋也

衆人庵盡圓君庵獨云方君雖樂其中無乃太異常勸
君利其角使稱著月牀自然制度穩名號亦可詳東西
南北不足辨左右前後誰能防願君見聽便如此鼠蝎
四面人恐傷

月嵒齋又言累石為山上有一峯穿寢如月

謂之月嵒齋

詩中子平
卽子瞻也

月為太陰精石亦月之類月常寄孕於石中事理如此
何足異天地始分判日月各一物寄名物乃入形器安
有形器不消沒况此日與月曉夜東西走珠流璧轉無
暫停豈與天地同長久其為勞苦世共知惟是月有生
死時既然須常換新者人但不見神所為日須天上生
月必地中產君不見鄆州朱陽縣之山谷間纔成未就
知何限石有不才者往往其卵殼靈媧棄置不復惜任

人取去為珍玩佳者留之待天取藏滿庫樓千萬許彥
瞻博物天下稱更無定不以予之說為寢語予恐世人
不知嵩丘嵒洞中中有八萬二千修月戶其人所食盡
玉屑昔有王生見之滿襟提斤斧應是當年靈鷲山直
自天竺飛落西湖前其上有石姓月月已滿此人竭來
就彼剜剔歸上天所以此石折齧不復合至今神胞所
附之處其痕圓拋擲道傍凡幾歲風刷雨淋塵土穢子
平一見初動心輦致東齋自摩洗更選他山相擁列就

中獨爾一峯最奇絕每至瑤魄流光下照時玉柱橫欹
無少缺子平謂我同所嗜萬里書之特相寄邀我為詩
我豈能窓前累日臨空紙遙想嵒前寶穴通玉蟾從此
去無蹤請君為我細書字側名為月母峯

寄貞文饒屯田

英英文饒江漢士何者天教喪眸子用心專一性轉明
無所不知餘兩耳能為樂府勝張籍暗誦史書過杜頡
棄官新自荆渚歸萬里逆風衝峽水峩峩全家載巨艤

坐卧吟詩滿千紙自言從此生事足可了芋栗及麻枲
數椽舊屋蔽風雨一榻蕭然容隱几丘明國語浩如雲
子夏門人紛若蟻向人問口誇舌在道義文章吾豈已
自知俗事無所觀便落雙睛君亦喜

奉送少訥還青神

濕雲堆空洩淫雨日與三嵎氣相軋春陽沈伏不得動
萬木屈蘖草藏虫叢岡複嶺誰敢度旦暮寒鷄叫泥滑
少訥胡為犯此苦特念我困來省察延之累日對佳話

如侍大饗聽控揭彥瞻弟兄別已久使我心胸昏莫刮
天將少訥愈我病次第為取蹊茅拔長編巨軸寫治亂
筆墨揮灑何橫猾詞章直如子長健辯論不比仲連點
我慙無琴類師曠鶴誤銜珠投二八酌泉煮蔬共家饌
敢用俗禮費烹殺少訥忽爾道其去歸轍在途不可揠
此懷作惡定數日憤憤已覺漸磨戛欲留少訥意無盡
更為逡巡枳西轄

送無演歸成都

曾讀契嵩輔教編浮屠氏有不可忽後於京師識懷璉
彼上人者尤奇崛余嘗從容問其友璉復為余道居訥
是三大士才過人所畜豈肯吾儒屈文章汪洋道義富
不止區區事其佛余思此等更誰似蜀有人焉頗超越
成都敏行字無演所謂萬星中一月想嵩璉訥見須避
不爾往往被呵咄通禪曉律兩無碍前會定預耆闍崛
羣經列史固汗漫獨泛其深仍出沒外之所精者書畫
不問不語常若吃計其夏臘殊未幾在大衆中誠突兀

余守陵陽至窮陋雨浸一春泥汨汨英磯碗礮登道嶮
行客歎歎上齒卒無演衝冒獨不顧來歎余門手持謁
呼之使前見已喜相見圓滿藏神骨退之送澄觀詩有坐睨神骨空潛然句

之清譚坐久愈飄灑頓遣塵襟落如拂新詩古文覽嘉

覩氣格俊健凌霜鶴觀其衆衆出論議收斂便可與簪

笏試將邀之使從仕笑指此頂安更髮日招與語自無

厭何乃告去苦倉卒西城曉日照高嶺倒塔乾陀入深

樾師歸常宜見嘉祐此老心中已無物好音相與頻寄

惠余在空山正伊鬱

閻君見示岷山賦因為小詩謝之

大岷西南鎮嵒壑天下秀厥初造此者以作神仙囿相
如予雲沒李杜繼其後欲賦俱未敢於詞怯輕構閻君
通方士才力誰可闢驅聯入健筆萬狀無一漏駿駿語
趨勁駿馬雜馳驟太華楊已拙天台孫亦謬示余讀數
過驚聳肩縮胆勉為成短章聊酬君意厚

閻生談黃庭

茫茫誦靈文誰為抉久瞽不能辨三一宣復更知五方
迷得真指忽悟有奇觀自此日相親赤龍交黑虎

送范堯夫

迢迢走問巷都人起中宵相擁候府門惟恐失此朝盡
言來送公車馬城北橋橋邊脂輶亭大尹此相邀歌管
盛宴集簪裾合羣僚四座酒既行相顧魂已銷亭前有
楊柳秋風減長條折以持贈公莫厭霜葉凋節物雖謂
晚比春情更饒遞起勸公飲雙呼金翠翹豈徒要公醉

恐公遠乘輶借問何爾為重公若瓊瑤美質未省變與
人存久要既莫不可留征衫遂飄飄鳴騶過昇遷羣甿
閑如蜩感公來二年免我於無聊今公舍我去何由借
諸朝願君富且貴壽命等松喬直似先令公巍巍佐唐
堯涕淚逐公行不憚公更遙公誠上下通和如奏笙簫
所以得如此人情不相遼嗟同繆與公一時赴弓招于
今二十年不見有所超前日荷君相與印垂之腰使歸
守山郡藏伏甘寂寥聞公將治行乃心日夜搖恨不能

送公俛首類酸瘠徒為送公詩有如草蟲嘒強勉寫之
去憂來立危謙

推官惠李庶子鄂州篆字

天下有奇篆陽冰書鄂州異獸呀五口狂蛟掉三頭礮
呵玻瓈盃詰屈珊瑚鈎愧無希世寶何以為子酬

和提刑度支王店鷄詩

王店有郵吏養鷄殊可笑昂然處高襟不肯以時詔官
有宿此者西征待初曉鷄竟不一鳴問吏吏已告云此

最荒絕左右悉蓬蓼狐狸占為宅恣橫不可道前此三四鷄一一遭其暴尋聲即知處盡獲爪牙禍自後始得此其若有人教東方或未明羣醜尚騰趨此鷄但鉗結直伺太陽耀雖然謂失旦似得保身要官曰此何用不然則宜糴不見不鳴雁先死蓋自召天下已明白豈假更喧鬧徒爾費稻粱曾莫知所報更云官言是且願勿嘲謔知是本在人此物何足校

送李道士

先生若孤雲兩在隆山見清標瘦彌聳秀骨老愈健高
談吐深詣大句寫精鍊忽起憶鵝池蟲飛石泉濺

送韓山人

昌黎山人抱藜杖三度訪我於三隅端然入座更誰顧
談辯衆衆如流珠靈丹嘗凝日月鼎至寶自產乾坤爐
要行撇起不可遂安得雙鳥為飛鳬

丹淵集卷十